

Pangasinan - Bibii Masanton Sulat - Wives Scriptures

Efeso 5:22-24 Bibii, toluk kayod kaasawaan yo, a singa katotoluk yod Katawan. 23 Ta say laki et pangulo na asawa to, a singa si Cristo et pangulo na iglisia. Si Cristo met so Manangilaban na iglisia a laman to. 24 Kanyan no panoy itotoluk na iglisia ed Cristo, ontan met a saray bibii nepeg day ontoluk diad amin a bengatla ed saray kaasawaan da.

Efeso 5:31,33 Onung na ibabagay Masanton Sulat, "Lapud saya, taynan na laki so ama tan ina to, tan iyamung toy asawa to, tan magmaliw iran saksakey a laman." 33 Balet sikayo met so kipaakaran to: balang laki nepeg ya aroen toy asawa to a singa panangaro tod sikaton dili, tan balang bii nepeg a galangen toy asawa to.

1 Corinto 7:3 Nepeg a gawaen na laki so kanepegan tod asawa to; ontan met ed bii.

1 Corinto 7:34 Kanyan nankadwa so kawalaay kapagaan to. Ontan met, say biin anggapoy asawa o say marikit et mapaga ed saray kimey a nipaakar ed Katawan, no panoy pagmaliw ton masanto diad laman tan ispiritu; balet say biin walay asawa et mapaga ed saray antokaman ed sayan mundo, no panoy pamaliket tod asawa to.

Colosas 3:18 Sikayo ran bibii, toluk yoy kaasawaan yo, ta sikato yay linaway Katawan.

1 Timoteo 2:11-15 Nakaukolan a maren iray bibii no mantitipon iran manaral tan nakaukolan a sigput iran matoluk. 12 Ag ko abuloyan a saray bibii et mambangat o manoley ira ed saray lalaki; nakaukolan a mandeen ira. 13 Ta si Adan sikatoy inmonan pinalsa, insan si Eva. 14 Aliwan si Adan no ag ingen samay bii so apalingo tan anumlang ed ganggay Dios. 15 Balet say bii nilaban diad panamegley na pananak to, no sikatoy mansiansiad pananisia, aro, tan kasantosan a katekep day kasimpitan.

Genesis 3:16 Inkuanto natan ed samay bii, Aruman koy gunigon mo no manlokun ka tan nairapan ka ed pananak mo. Anggaman

ontan, pampilalekan mo nin siansiay asawam tan sikatoy manoley ed sika.

1 Pedro 3:1,2 Ontan met, sikayo ran bibii, paoleyan kayod kaasawaan yo. No walad sikaray ag ni manisiad salitay Dios natanggoyur iran manisia, diad panamegley na maung ya ogali yo. Anggano ag yo la ra paliwawaan, 2 ta nanengneng da lay masimpit tan malinis a kabibilay yo.

Tito 2:1-5 No say sika balet, salitam so ontokuy ed tuan bangat. 2 Ibagam ed saray mamatakken a lalaki a mambilay iran makalakal, mapagalang, maadya, mabiskeg ed pananisia, maaro, tan maanos. 3 Ontan met ya ibagam ed saray mamatakken a bibii a mambilay iran masimpit, ag ira mantatalabutob, tan ag ira mambuabuanges; mambangat ira ingen na kamaungan, 4 pian natanggoyur da ray malangwer nin bibii a mangarod kaasawaan da tan saray anak da, 5 mambilay iran maadya, masimpit, maung a mangasikasoy abung, mapangasi tan maonur ed kaasawaan da, pian ag napabanday so salitay Dios.

Saray Probirbio 12:4 Say maung ya asawan bii pakagagayagaan tan ikikinon na asawa to. Balet say bii a mangiiter na kababaingan ed asawa to et singa kanser ed saray pokel to.

Saray Probirbio 14:1 Ombibiskeg so pamilya lapud kakabatan na saray bibii, balet naderal so pamilya lapud inkakulang-kulang.

Saray Probirbio 19:13 Say makulang-kulang ya anak nayarin deralen toy ama to. Say makolkol ya asawan bii et singa ag manondan panterterter na danum.

Saray Probirbio 21:9,19 Magmaung niy manayam ed atep na abung nen say miamung ed biin makolkol. 19 Magmaung niy manayam ed disirto nen say miamung ed makolkol tan mariklamon asawan bii.

Saray Probirbio 25:24 Magmaung niy manayam ed atep na abung nen say miamung ed biin makolkol.

Saray Probirbio 27:15,16 Say biin asawa a makolkol et singa ag manondan manterterter ya oran no nepnep. 16 Say pamatondam ed sikato et singa say pamatonda ed siplug na dagem odino say pangakup ed larak.

Saray Probirbio 31:10-31 Agaylay irap so mananap na maung ya

asawan bii! Mabmabli ni nen saray alahas! 11 Walay panagmatalek ed sikato na asawa to, kanyan ag balut onirap so bilay to. 12 Legan ton mambibilay, say pankaabigan aliwan say pankaogsan na asawa to so gagawaen to. 13 Makoli-kolin manggagaway abel a lana tan linen. 14 Mangisesempet na saray taganon nanlapud saray arawin pasen, a singa gagawaen da ray bapor na nigosanti. 15 Abangon la no palbangon, ta mangiparaan na pangalmusalan na pamilya to tan bibilinen to ray katulong ton bibii no antoy gawaen da. 16 Mannenengneng na alog tan sasaliwen to, insan say nalmoan ton kuarta ikakana tod pantatanem to na ubas. 17 Mabiskeg a mankimey tan makolikoli. 18 Amta toy kablian na amin da ray gagawaen to, tan manzikimey ni anggan aralem lay labi. 19 Gagawaen toy dilin tinebey to tan gagawaen toy dilin abel to. 20 Mabonluk a mangiiter ed saray mairap-bilay tan saray walad pankaukolan. 21 Anggapoy pagpaga to anggan ompelag so yilo, lapud makakapal iray kawes na kabyangay pamilya to. 22 Manggagawa na saray apis na katri tan pinon ambalangan linen so ikakawes to. 23 Bibirbiren ed balay so asawa to tan sakey ed saray manonan mibabaley. 24 Manggagawa na saray abel tan saray balkes, insan to ra ilalako ed saray nigosanti. 25 Mabiskeg tan gagalangen na katoowan tan anggapoy pagpaga to ed arapen a panaon. 26 Mapalna tan napno na kakabatan so panagsalita to. 27 Wala lawas so gagawaen to tan iiter to ray nakakaukolan na pamilya to. 28 Papagalangan na saray anak to, tan idadayew na asawa to. 29 Kuan na asawa to, Amayamay iray bibiin maung ya asawa, balet sikay sankamaungan ed sikara. 30 Makapalikdo so limgas tan mangangga so ganggana, balet nepeg ya idayew so biin papagalangan toy Katawan. 31 Birbir mo lapud saray gagawaen to. Kanepegan toy pagalangan na amin a totoo.